

新疆图志

新疆圖志

新疆圖志卷八十七

古蹟

迪化縣

烏魯木齊故城 在城西十里西域圖志云乾隆二十年正月大兵征準噶爾多爾濟降地皆內屬有舊城周可三里
賜名迪化卽明故城也案明史瓦剌國後分爲四衛拉特其和碩特部治烏魯木齊準語烏魯木齊好大圍場也

昌吉縣

張堡廢城 城東二里有城墉舊基闊丈二尺斷垣存十之二三土人呼唐朝城案唐地志輪臺縣西百九十里張堡城守捉卽是地也城中二土墩尙高丈許居民戒不得侵犯犯則非雷兩交作卽本身病狂

綏來縣

唐朝渠 城北五百四十里魚窩鋪有廢渠在阿雅爾淖爾南闊

約丈餘長數十里相傳唐時所開距渠數里有伽藍廢址道咸之際居民猶見木質神像五尊均高丈許後爲飛沙所壓漸成高阜夜闌陰雨隱聞鐘聲光緒三十三年奏設唐朝驛北通阿爾泰

熱水泉 城西二百九十里博羅屯古莊西南入山馬行六十里有熱水泉自石壁流出浴之已疾衆建石室五間每年五六月游人絡繹于道臨潼溫泉不是過也

雪淖壩 城西百九十里長樂堡一名石廠山頂有雪淖壩望之如琉璃世界周圍五六里積雪不消雪鷄飛集其上沿岸產雪蓮宣統庚戌知縣文篤周曾親至其地

阜康縣

達摩祖師面壁處 方士淦東歸日記云巴克達山高峯插天冰雪不化頂上常有雲氣每年五月阜康縣令率民人致祭香火極盛山行十五里下車步行直至中層平衍寬廣有天池二形

似葫蘆清冷可愛乾隆年間明將軍瑞欲引池水下山通渠溉
灌水不下注池邊有琪花瑤草相傳爲達摩祖師面壁之所仰
視高山如在天際人不能上矣

孚遠縣

千佛洞 西域釋地云濟木薩城西南十餘里有千佛洞山中樹
木叢茂乾隆三十五年有人病目翳已失明矣入樵山採目暴
腫痛不可忍遙聞山間人語云山下泉水洗目宜愈若是者三
其人匍匐而下耳畔水聲淙淙祝而洗之痛良已再三掬洗目
忽明乃悟語之者非人也因望空謝尋舊徑欲歸瞥見土石裂
處粉垣半露隱約有洞亟歸告其儕携鍤具往洞甚深黑燭之
形如半月有大佛臥其中三州輟略云佛身長一丈六尺金面跣足顏色如新洞中銅
佛像尺餘至三五寸者甚多不知何代所供養也其人感佛拯
救誓落髮爲僧住此山募修莊嚴極其壯麗洞中銅佛九尊曾
入貢云案王延德高昌行記云時四月師子王避暑北庭

北庭都護府在今孚

遼城北三十里之護堡

邀延德凡六日至北庭憇高台寺明日遍游境內佛寺

有曰應運秦甯之寺貞觀十四年造此洞當亦唐時遺址也

唐北庭都護府故城 在城北二十里城週四十里以土塹壘城

每塹厚一尺闊一尺五六寸居民呼唐王城亦呼破城子西域圖攷車師後王庭治務塗谷今濟木薩地其古城在今保惠城北二十里亦名金滿城唐北庭都護治也西域水道記濟木薩卽西突厥之可汗浮圖城唐爲庭州金滿縣又改後庭縣北庭都護治也遺址尙存相傳李衛公德裕所築槐西雜誌謂城中一寺已圯盡石佛自腰以下陷入土中猶高七八尺鐵鐘一高出人頭四圍皆有銘鏤澁模糊一字不可辨識惟刮視字棱相其波磔似是八分書耳

吐魯番廳

交河故城 在城西二十里雅爾湖廢垣周七里漢車師前王治

交河城河水分流繞城下故號交河唐西域傳高昌王都交河

城漢車師前王庭也光緒辛丑同知文立山於城中掘得唐開元十年蓮華經一卷書法逼近二王

銀山 在城西南四百一十里庫木什驛回語庫木什銀也唐人呼爲銀山郭孝恪率步騎三千出銀山這是也

火山 在城東九十里勝金口山皆赤色如火焰形魏書高昌郡氣候溫煖北有赤石山故明史有火州之名肅州志亦作火焰山

十萬羅漢削髮處 西陲紀畧云靈山在安樂城西北百里卽博克達巴罕之陽近山有高臺旁有僧寺寺下有石泉林木入山行二十里至一峽峽上有小土屋南登山坡坡上有石屋中有小佛像五屋前有池池東有山青黑色遠望如披毛髮人言此十萬羅漢削髮處也循峽而南行六七里登高崖崖下小山纍纍峯巒秀麗羅列成行峯下白石成堆似玉輕脆不可把握惟中有若人骨狀者則堅如石文鏤明晰顏色光潤人言此十萬

羅漢靈骨也又東石崖下石筍如人手足稍南至山坡有石瑩如玉人言此辟支佛涅槃處也自吐魯番城北行百一十里至靈山石青黑色遠望紛如毛髮亦奇觀也

狼頭蠡 隋書突厥傳其先世國於西海之右爲隣國所滅男女無少長盡殺之至一兒不忍殺則足斷臂棄大澤中有一牝狼每銜肉至其所此兒因食之得不死其後遂與狼交有孕彼隣國者復令人殺此兒而狼在其側使者將殺之其狼若爲神所憑歛然至於海東止於山上其山在高昌西北下有洞穴狼入其中遇得平壤茂草地方二百餘里其後狼生十男其一姓阿史那氏最賢遂爲君長故牙門建狼頭蠡示不忘本也案西域圖志謂高昌西北山卽迪化東北哈喇莽奈鄂拉

鄂拉蒙古語山也

鄯善縣

漢墩 一統志云罕都在闐展城西北百里有土城西南小山上有二墩相傳漢時所築案西域圖志謂漢墩或罕都之訛

鎮西廳

巴里坤八景、方士淦東歸日記云巴里坤漢之月支也本係蒙古遊牧地居天山之陰夏月冰雪不化山逼城垣寒冷異常居民商賈多在城外西北有海週圍六十里海沿泥淖人不能到漢書蒲類海也常現海市相傳中有寒鼉文武衙門只鳴頭礮不鳴二礮松相國奏入祀典春秋致祭地方重鎮爲牧場最繁之區其地有八景曰天山松雪蒲海鼉城岳台留勝

本朝岳威信會駐兵山上

山曉日鏡潭宿月黑溝藏春龍宮烟柳秋稼堆雲金桐軒曾親見八景云岳台最雄傑前有八陣奇門旁能容萬馬黑溝去城三十里路難行一入山內豁然開朗蒼崖絕壁樹木千章飛泉瀑布琪花瑤草別有洞天惟高處不勝寒風雪所常耳鼉城卽海市蜃樓天陰則見亦奇觀也龍王廟獨有柳樹他處絕無故有烟柳之勝

西域釋地云蒲類海一名婆悉海俗不知其名呼爲海子在城

西北沙山之下東西袤一百餘里對岸寬數十里晨興過此往往見有樓台殿閣城垣街衢之狀

沙山古營 在城東南一百六十里松樹塘對面山麓有沙坡一段長十里許牧人入山深處夜聞鈴鐸音相傳昔覆軍於此案後漢呼衍王將三千餘騎寇伊吾伊吾司馬毛愷遣吏兵五百人於蒲類東海與呼衍王戰悉爲所沒沙山正蒲類東也

天山玉碑 墩煌太守碑在巴里坤天山關壯繆祠內高五六尺厚尺餘色黑堅潤類玉天然石筍不假雕鑿碑陽碑陰均凸凹不平碑文下虛尺餘無字有回民欲盜之挖至丈餘根不能盡其人病魔而死相傳漢碑能避水唐碑能避火須五月五日午時揚者方驗唐碑在巴里坤北門外覆之以亭平臥地上

漢唐碑文
詳金石志

哈密廳

九龍樹 城西三里有回城札薩克所居西南隅有古樹分根劈幹偃仰如龍相傳千餘年物也陶葆廉侍行記言某阿渾家有

九龍樹往視則老楊臥地處處生根枝幹糾紛穿垣踰壁蔭十餘丈案龍臺縣和吉莊有千年老柳覆蓋四畝亦號九龍樹回紇墓 城東南五十里星星峽山麓有回紇墓纏回呼爲麻札相傳唐大將軍某俘回紇七人歸其一歿于途葬此屢著靈異土人爲釀金建屋覆其壘禱輒響應區額充棟亦有施錦幃墓上者恒積至尺許

庫爾喀喇烏蘇廳

蓮花池 西域釋地云城西二里許小邱形周如釜中有蓮花池水極涼約深數尺四時不消不長每夏白蓮從水底挺出花朵稍小間有如盃大者幹或長至一二丈可異也案池在城北二里

西域釋地誤在城西

其形如甌相去二里有碧泉池其涼震齒

伊犁府

綏定縣

四十八橋 西域水道記云塔勒奇嶺爲伊犁北境門戶新溝之

西二十餘里曰果子溝谷長七十里北有峻嶺扼之嶺上多松
名曰松樹頭嶺嶺東有泉曰察察布拉克西流至谷中有紅水
泉發自松樹頭嶺下來匯谷西山亦有水曰烏蘭烏蘇東南流
來匯同南流經鄂博勒齊爾軍台西軍台距松樹頭三十里有
庫爾齊布拉克水由東來匯又南流有烏博勒齊爾水由西來
匯凡三十五里經塔勒奇卡倫又南流三里有將軍布拉克水
由東來匯又南流二里經塔勒奇阿璊軍台東又南流里許繞
谷外奔湍迅急聲聞數里谷中跨水架橋四十有二峭壁夾道
蒼松據崖山鳥飛鳴林木陰翳入伊犁者驛程經此塞沙眯目
頓覺清涼迨乎初冬雨雪填谷行縱斷絕又以是爲險隘也元
長春西遊記云沿天池南下左右峰巒峭拔松檜陰森自巔及
麓何啻萬株衆流入峽奔騰洶湧曲折彎環可六七十里二太
子扈從西征始鑿石理道刊木爲四十八橋橋可並車薄暮宿
峽中翌日方出東西大川水草豐秀天氣似春稍有桑棗蓋四

十八橋其來已舊今因其遺址爲四十二橋彼土不知謂爲保文端所刼案果子溝舊有四十八橋乾隆時保文端改爲四十二餘六橋均峭壁懸崖寬僅十尺每值春融雪霽或陰雨連綿輒被水衝折行旅視爲畏途光緒丙午將軍馬亮傍山鑿石闢路甚多少夷其險今存小橋七大橋十一

佩劍翁仲 賽里木淖爾西岸石城堡遺址中一著巾帶劍翁仲偃仆草間右手撫劍左手當胸若捧物狀石已殘泐莫知年祀西方淨海 塞外錄云賽里木淖爾有島嶼無輪委不生一物不染一塵投以巨細物頃刻必漂浮上岸水色深綠環以雪峯久視之覺心形俱澈土人稱爲西方淨海中有神獸青牛大角而多髯見則雨雹

石翁仲 西域水道記云台畢爾哈圖山口遙望海氣接天不知所極西行四十里乃海北岸其處翁仲無慮數十嘉慶十七年索倫營領隊福勒洪阿行邊至此賦詩

詩曰久戍邊城客似家而今雁爪更天涯殷勤說與殘翁仲不是前朝舊鼓笳

謂

此翁仲古疑兵之遺然兵行神速拔幟揚塵豈容龍龔此古勃律君長葬地或有陪葬如唐昭陵製歟

塔城廳

青石佛跡 西域水道記云察罕托海卡倫之西有溫泉浴之已疾每際夏初游者絡繹有一青蛇時浮水面見者禮拜號曰神蛇泉旁達摩寺中青石一方上有足跡長尺餘深寸許縷紋悉備不類雕刻故老相傳達摩浴此留跡而去是猶阿育王太子見行七步足跡文理見存也

溫宿府

溫宿縣

俱毗羅廢城 在城北九十里唐地理志安西西出拓厥關渡白馬河西入俱毗羅磧經苦井百二十里至俱毗羅城西域圖攷云卽今賽里木城也遺址猶存

拜城縣

漢烏壘關 光緒丁丑劉襄勦錦棠督師西上部將提督徐萬福
統建威軍先驅在拜城東二百里明布拉克山見一石刻迺梯
絕壁剔苔蘚摸搨其文係漢永壽四年八月甲戌淳于某爲龜
茲左將軍劉平國作頌末書有此東烏壘關五字

庫車州

漢楮輪迴經 城西北九十里托和爾達坂之西南有千佛洞人
呼丁谷山山之上下前後鑿洞四五百皆五彩金彩繪西番佛
像惜多剝落最高一洞三楹壁鑿白衣大士及漢楮輪迴經一

部

相傳是
唐人書

餘皆番字

石面履跡 唐西域記云屈支國城北四十餘里接山阿隔河有
二伽藍同名昭怛釐佛像裝飾殆越人工東昭怛釐佛堂中有
玉石面廣二尺餘色帶黃白狀如海蛤其上有佛足履之跡長
尺有八寸餘每遇齋日照燭光明案石今不復見

焉耆府

唐鐵門關 晉書西戎傳云沙州刺史楊宣疆理西域宣以部將張植爲前鋒所向風靡軍次焉耆熙拒于賁崙城進屯鐵門未至十餘里熙又率衆先要之於遮留谷植將至或曰谷名遮留殆將有伏單騎營之果有伏發植擊敗之進據尉犁熙降

唐書地理志自焉耆西五十里過鐵門關又二十里至於術守捉城

西域圖志云按晉書鐵門應卽唐書之鐵門關今庫爾勒爲古焉耆西境則焉耆西五十里之鐵門關宜在今庫爾楚之東也晉書遮留谷未至鐵門十餘里唐書于術守捉城東至鐵門關二十里宜與今庫爾楚相近晉陽宣部將張植由鐵門遮留谷進據尉犁尉犁在漢爲焉耆西南百里國在晉爲焉耆西界之城是時疆理西域還攻焉耆從國之西境入是以先據尉犁而鐵門遮留谷之在今喀喇沙爾西境益無疑也

西域水道記云自庫爾勒北二十里至巖口所謂遮留谷入山

徑路崎嶇三十里越大石嶺下逼開都河地處要害或建關於此唐岑參有題鐵門關樓及宿鐵關西館詩下嶺十里至哈勒噶阿璊軍臺河水又西行三十餘里出山水經注曰又西出沙山鐵關谷也

案哈勒噶阿璊驛山谷亦名鐵關谷哈勒噶準語謂道路阿璊言地當山口也唐時焉耆在今府西四十里又西五十里卽鐵門關今哈勒噶阿璊距焉耆恰九十里關當在此

廢城 在城東北一百九十五里察罕通格廢垣存十之三四何代何年建置載籍無徵西域圖志亦云廢城城西有泉委折而南分渠溉田

輪臺縣

輪臺故城 在縣治東南六十餘里西域水道記所云故大城也城中有土臺高三丈許週二百餘步城外一臺較小略低居民不時掘得古玩器物西域圖志云輪臺自李廣利屠之後其國